

PKR gesa KWAP, Tabung Haji tuntutan 1MDB langsi baki sukuk tertunggak
Malaysian Insider
Jan 18, 2016

Setiausaha agung PKR Rafizi Ramli menggesa Tabung Haji dan Kumpulan Wang Amanah Pencen (KWAP) menggunakan haknya mengikut perjanjian untuk menuntut syarikat sarat hutang 1Malaysia Development Berhad (1MDB) membayar kembali semua baki tertunggak dari terbitan sukuk secara serta-merta.

"Saya sudah menyatakan minggu lepas bagaimana 1MDB melanggar perjanjian terbitan sukuk sebanyak RM2.4 bilion yang dilanggan Tabung Haji dan KWAP.

"Setakat ini, 1MDB atau Tabung Haji atau KWAP masih belum mengeluarkan apa-apa kenyataan menjawab atau menafikannya walaupun 1MDB selalunya memberi jawapan balas dalam tempoh kurang daripada 24 jam," kata ahli Parlimen Pandan itu dalam satu kenyataan hari ini.

Menurut Rafizi, disebabkan 1MDB tidak menafikan perkara ini, beliau percaya perkara-perkara yang didedahkan sebelum mempunyai asas kuat.

"Perjanjian terbitan sukuk mempunyai peruntukan yang jelas bila mana-mana fasal perjanjian itu dilanggari 1MDB," katanya.

Rafizi merujuk Fasal 2(v) mukasurat 27 menyenaraikan perkara-perkara dikira melanggar perjanjian ("events of default") yang diperincikan dari perenggan 1 (mukasurat 27) hingga perenggan 13 (mukasurat 30).

Beliau berkata, Fasal 2(v)(5) mukasurat 28 menyatakan kegagalan mematuhi mana-mana terma di dalam perjanjian dikira sebagai melanggar perjanjian.

Rafizi mendedahkan, perenggan terakhir Fasal 2(v) mukasurat 30 katanya menyatakan hak pemegang sukuk (Tabung Haji dan KWAP) apabila perjanjian dilanggari, mereka berhak menuntut semua baki sukuk dan bayaran keuntungan dilepaskan serta merta oleh 1MDB.

Katanya, jawapan Perdana Menteri Datuk Seri Najib Razak di Parlimen sebelum ini mengesahkan Tabung Haji melanggar sebanyak RM920.8 juta daripada terbitan sukuk 1MDB.

"Baki selebihnya dipercayai dilanggani oleh KWAP sebanyak RM579.2 juta.

"Ini bermakna, terbitan sukuk 1MDB berkaitan Bandar Malaysia setakat ini telah mencecah RM1.5 bilion yang diberikan oleh Tabung Haji dan KWAP kepada 1MDB," katanya. – 18 Januari, 2016.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/pkr-gesa-kwap-tabung-haji-tuntut-1mdb-langsai-baki-sukuk-tertunggak>